

“Bosna i Hercegovina otvorena za investicije”

Govoreći na konferenciji o investicijama u Londonu, visoki predstavnik Paddy Ashdown je danas pozvao međunarodne investitore da, poučeni uspjehom koji su iskusile strane banke u Bosni i Hercegovini, uđu na ovo tržište dok zahtjevne reforme koje su u toku u proteklih par godina otvaraju stvarne mogućnosti investiranja. Poredeći BiH sa Poljskom i Mađarskom u ranim 90-tim, visoki predstavnik je istakao da je “ostvarena makroekonomska stabilnost; uspostavljene su monetarna i finansijska disciplina; makroekonomske reforme u cilju uklanjanja ostataka bivše socijalističke ekonomije i otvaranja zemlje prema međunarodnom tržištu i investicijama su u poodmakloj fazi.”

Naglašavajući kako je “sektor komercijalnog bankarstva transformiran međunarodnim sredstvima” visoki predstavnik je rekao da su strane banke brzo stekle povjerenje domaćeg tržišta – što je povoljno za same investitore kao i za klijente tih banaka. “Konkurencija koja je nastajala sve većim brojem bankarskih usluga koristila je građanima” rekao je visoki predstavnik. “Uz sva tržišta koja se otvaraju, oni koji prvi uoče priliku i koji se odvažaju da je iskoriste, požnjeće najbolje rezultate.”

Visoki predstavnik je nastavio naglasivši da će “nova radna mjesta u BiH kao i veće plate biti rezultat ove vrste stranih ulaganja u bh. privatni sektor, te da se to ne može ostvariti pokušajima oživljavanja propalih državnih preduzeća bivše Jugoslavije. “U današnjem svijetu nova radna mjesta ne otvara država već privredni subjekti.”

Visoki predstavnik je govorio na Bosanskoj privrednoj konferenciji koju su Ambasada Velike Britanije u Sarajevu i

Agencija za promociju stranih investicija BiH organizirale u Londonu, jednom od najvaćih finansijskih centara.

Visoki predstavnik je istakao da se ratne slike BiH više ne odražavaju na realno stanje danas i skrenuo je pažnju na godine mukotrpnog rada koji je uložen u obnovu infrastrukture i uspostavljanje demokratskih institucija, te moderniziranje krivičnih i komercijalnih zakona. "Taj proces je iziskivao mnogo vremena i izazvao dosta nereda kao i svaki građevinski rad," rekao je visoki predstavnik, dodavši da će rezultati postati očigledne tokom narednih godina.

Visoki predstavnik je skrenuo pažnju na srednjoročni program reforme u cilju proširivanja privatnog sektora i pokretanja novog kruga smanjenja poreza za stimuliranje investicija o kojem su se 2. decembra dogovorili premijeri i ministri finansija, te je potencijalne investitore upoznao sa uspješnim nastojanjima u okviru inicijative Buldožer na uklanjanju besmislene birokratije koja onemogućava zapošljavanje. Također je iznio ekonomski program – uključujući implementaciju reforme indirektnog oporezivanja, formiranje jedinstvenog sistema za registraciju preduzeća, utvrđivanje jedinstvene i sveobuhvatne trgovinske politike, uspostavljanje procedure za izdavanje certifikata za Evropsku zajednicu u cilju podsticanja izvoza, kao i poboljšanja u oblasti prikupljanja podataka i strukture državnog budžeta – koja se moraju ostvariti u narednih šest mjeseci ukoliko BiH želi započeti pregovore za Sporazum o stabilnosti i pridruživanju sa EU. "To su ciljevi koje je moguće postići" , rekao je visoki predstavnik, i svaki od njih će BiH učiniti privlačnijom za investicije.

"Mi u BiH smo u potpunosti svjesni toga da se *takmičimo*," rekao je visoki predstavnik. BiH radi na tome da postane konkuretna kao njeni susjedi u Jugoistočnoj Evropi. BiH već ima najstabilniju valutu na Balkanu, a stopa inflacije je nula. Velika dijaspora koja je nastala kao posljedica rata, nakon čega je uslijedio val povrataka iz prekookeanskih

zemalja, doveli su do nastanka radne snage koja uključuje pojedince sa poznavanjem više stranih jezika i bogatim iskustvom; plate su konkurentne, a BiH ima dobar geografski položaj. Ona je vrlo blizu zemljama članicama EU i istovremeno u srcu zone slobodne trgovine u Jugoistočnoj Evropi, koja ima domaće tržište od oko 55 miliona potrošača.”

Visoki predstavnik je naveo kako je moguće da je, zbog neprijavljenog prometa koji se odvija na osnovu gotovinskog plaćanja, stvarni ekonomski rast znatno veći od onog koji pokazuju zvanični podaci. “Loša vijest je to što se državni organi još uvijek bore da nađu načina i urede veći dio ovog neregistriranog prometa, a da ih pritom ne unište. Dobra vijest je to što taj promet uopće postoji – to je znak dinamičnog poduzetničkog okruženja koji može biti odskočna daska za ekonomski razvoj. Kao i u drugim zemljama u tranziciji. BiH je suočena sa izazovom da uspješnu sivu ekonomiju integritira u glavne ekonomske tokove.”

Zaključio je pozvavši 200 predstavnika poslovnih subjekata koji su pristustvovali konferenciji da iskoriste priliku i investiraju u BiH.